

Deo optimo maximo uni & trino, Virgini Deiparae, & sancto Lucae orthodoxorum Medicorum Patrono.

QUÆSTIO MEDICA,

Cardinalitiis disputationibus manè discutienda in Scholis Medicorum, die Jovis decimâ-septimâ Martii.

M. JOANNE BOUDIN, Doctore Medico, Præfide.

An Ostreum crudum esca saluberrima?

VITA hominis sanguinis præsertim beneficio sustinetur. Eo quaquaversum diffuso corpus universum nutritur & crescit; dum scilicet ex liquoribus quos secum portat omnigenis, qui parti cuique est maxime idoneus, non quidem iners & otiosus, attrahitur; sed graviter impulsus admittitur. Ex eodem fonte dimanat spiritus, sensus motusque principium. Sanguinem ideo inculpatum sanitas, vitæque longitudo: sordidatum morbi, matura senectus, tonique tandem dissolutio, consequuntur. Maxime autem ad id interest quâ ratione cibis ventriculo exceptus subigatur. Si res naturæ votis respondeat, laudabilis chylus venis arteriisque infusus, perenni motu & fermentatione particularum, figuram & situm nactus ab eo quem prius habebat diversum, sanguinem suppeditat ut suæ bonitati, sic partium singularum desiderio respondentem. Hinc tanta medicos, ut prima illa in ventriculo opera succedat, sollicitudo angit. Ad id, omne punctum feret, qui beatus sciet familiare alimentum, alienumque internoscere. Rejicienda sunt pleraque, quæ paravit ars gula, deliciis addita, non sanitati, sumenda quæ prudens natura obtulit, succi optimi, coctionis non difficilis, præcipuè si diversî generis fibras quibus gaudet ventriculus, ejusdemque fermentum juvant & ad agendum promovent.

QUI Facultatem ut veram & unicam coctionis causam assignant, illi non sunt inter Physicos numerandi. Non minus etiam hallucinantur qui eam caloris unius ope absolvi contendunt, licet ad alimentorum dissolutionem non sit omnino inutilis. Causa præcipua fermentum est, non acidum: sed naturæ singularis, & illi persimile, quod nonnullis Alcha est nuncupatur; ab illo nempe nullum alimenti genus intactum relinquitur, cum multa sint tamen, quæ acidorum vim eludunt. Illud non à liene, hepate, nervis, venis, aut vasis quæ lymphatica dicuntur, desertur ad ventriculum; originem ducit à glandulis conglobatis, quarum ope à sanguine segregatur, eodem modo quo urina in renibus, bilis in hepate, in pancreate succus non multum à saliva absimilis, denique liquores omnes naturæ ejusvis, qui in variis corporis partibus ad suos usus fecerunt. Fovetur à reliquis alimentorum, & fermentationis hesternæ. Hujus interventu alimenta dentibus incisâ & salivari succo permixta, dum mirabili deglutionis artificio ventriculo excepta sunt, in minutissimas partes dividuntur, & motu fermentationis mutatâ particularum figurâ, aliud corpus exurgit chyli nomine appellandum. Ad id etiam non parum confert ventriculi textura, cujus fibræ triplicis generis hanc alimentorum molem fuscitant, & mirum in modum agitant. Si igitur segnius sit fermentum, aut laxiores fibræ, chyli elaboratio pessima, proindeque sanguinis: si contra cuncta succedant, nihil desideratur ad coctionis opus absolvendum.

GULÆ simul & sanitati consulere, non ita facile est. Utrumque tamen in Ostreis videtur consentire delicatioris palati epulonibus, nec non severioris doctrinæ Medicis. Hinc Ostrea meritis palma mensuram tribuitur, quibus miscetur utile dulci. Horum ex patrescente limbo aut spuma circa navigia, generatio, fictitia. Immo mirabilis in Ostreis partium structura nonnisi ab ovo repetenda. In hoc rudis partium delineatio, solis interventu tandem explicatur. Quinetiam testæ ipsæ connatæ sunt, & prout mole accrescunt, à perenni aëris impulsu spiritalisque nisu, qui intus omnia subagitat, sensim in surantur. Iis musculus robustus per tendines suos adnascitur, quibus contractis occluduntur, relaxatis aperiuntur. Caput in Ostreo non minus est conspicuum, & inest quidquid habet in cæteris animalibus natura industrie. Ab ore transitus brevis & rectus ad ventriculum. Hujusceviæ satis ampla foraminulis quibusdam, mechanico more, alimenta pulsant in corpora subfusca duo ei utrinque affixa, quibus iidem usus esse videntur, qui vulgò mesenterii atque hepatis sunt. Purior chyli parte defecata, intestinum simplex & unicum gyro longissimo excrementa ducit, foras tandem propellenda. Infra ventriculum cor albicans cum auriculâ satis amplâ & subnigrâ, pulsû non obscuro, cujus unaquaque systole vitalis humor in Aortam pellitur. Non desunt etiam Ostreis vasa quedam peculiaria, quibus lymphæ ad intimos recessus vehitur partibus nutritionem datura, si in sicco diutius remaneant. Sed, non omne mare est generosæ fertile testæ. Ut Ostrea figurâ, magnitudine, coloribusque variant, variis in regionibus, sic & succi dignitate. Iis præsertim maribus gaudet, dum magnitudinis atque luxuriæ fastigium teneant, non nisi Lucrinis eruta littoribus Ostrea mensis apponebant, & sumtu non sine magno renovabant per damna famem. In hoc alimento nihil est quod ventriculo non sit amicum, levis & coctû facilis caro, humor quo incitatur fermentum, quo recreantur fibræ; succus laudabilis venis committitur.

INSPECTA Ostrearum compage, illis omnes inesse alimenti optimi conditiones nemo sanæ mentis impugnet. Non modò coctû facilis caro & quam subeat perfectè ventriculi fermentum; sed lymphæ conceditur naturæ singularis, cujus interventu crescat & juvetur potissimum auctor ille coctionis præcipuus. Cave tamen ne illam boni succi putes, quæ intra testas occluditur, immixta sæpius excrementis, & ut plurimum rejicienda; sed quæ inter ostrei fibrillas abdita substantiam ejus ita penetrat, ut si Ostreum diutius extra testam remaneat, ferè totum in aquam resolvatur. Hanc ventriculi fermento persimilem demonstrat experientia, & iidem esse salubres referant quibus alimentorum dissolutio perficitur. His in conviviis ne timeas imbecillam coctionem, quibus, ut decet, Ostrea præmittuntur. Novum addunt illa fami stimulum. Sollicitus, ut ita dicam, Ostreorum pastu ventriculus, cibos querit & ab iis non opprimitur; sed leni fermentatione ritè parato chylò, quod à perenni motu & spiritu dissipatione deperditum est, reficit. Hinc si debilius sit fermentum à morbo, & nondum confirmatæ valetudinis stomachus ad alimentorum etiam visum nauseat, sæpius comperit esse profuisse Ostrea. Illorum nempe præsentia relaxatæ fibræ recreantur & ad opus se accelerant, inertes antea & oppressæ. Hæc præstant Ostrea, si absque ullo artis apparatu comedantur, quidquid habent dulcis & utilis amissura si cocta apponantur in epulis, indurantur enim quàm plurimum, & dum grato illo sale spoliantur quo sensum antea afficiebant, fermenti vim eludunt, totumque pervertunt coctionis opus.

QUIBUS igitur erit nonnulla in alimentorum defectu sanitatis cura, illi ne ab Ostreis imprudenter abstineant. Illis quippe inest succus purus, amicè salus ventriculo maxime conveniens. Non ergo mirum, eo apud eruditos epulones in honore fuisse, ut in remotissimas à mari regiones ligneis lacubus apportarentur, in quibus veluti eâ peregrinatione gaudentia, adoptatæque dulcibus aquis, mirè pinguescebant. Iis, si cruda sumas & qualia natura dedit, nihil suavis est. Nocet ut plurimum fastidiosus ille ciborum apparatus. Innumeros esse morbos miraris? Coquos numera, quos unus venter exercet. Ut & simpliciora medicamenta morbis medentur quàm plurimis, sic & simplicibus alimentis damna refarcienda sunt, quæ plerumque cæteris opsoniis augentur, non reparantur. Hac victus ratione laudabilis chylus vasis lacteis commissus, tandem mutabitur in sanguinem temperatissimum, functiones omnes ritè & rectè perficientur, nihil erit ad succorum separationem optandum; ad spirituum subtilitatem nihil desiderabitur. Ipsa anima hilarior, vis major ingenii, animi patiemata qualia sanitati non noceant. His instructus homo ad ultimam senectutem perveniet, nullique turbata incommodis ætas per taciturnam felicemque vitam indomitæ morti cessura.

Ergo Ostreum crudum esca saluberrima.

Proponerat Lutetiæ PHILIPPUS IGNATIUS SAVE, Montensis, Baccalaureus Medicus. A. R. S. H. 1689.

